



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

Broj: 01-GV-02-2041/22  
Sarajevo, 28.12.2022. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na 22. sjednici održanoj dana 28.12.2022. godine, primilo je k znanju

Informaciju o implementaciji Plana djelovanja za mlade.

*PREDSJEDAVALJUĆI GRADSKOG VIJEĆA*

*Jasmin Ademović, s.r.*

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** gsgv@sarajevo.ba  
**Web:** gradskovijece.sarajevo.ba





**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADONAČELNICA**

*INFORMACIJA*  
*O IMPLEMENTACIJI PLANA DJELOVANJA ZA MLADE*

*Sarajevo, decembar 2022. godine*

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 407 443  
**Fax:** +387 33 208 341  
**Email:** grad@sarajevo.ba  
**Web:** www.sarajevo.ba



## UVOD

Programom rada Gradskog vijeća Grada Sarajeva za 2022. godinu planirana je realizacija teme *Informacija o implementaciji Plana djelovanja za mlade* kvartalno, odnosno u mjesecima martu, junu, septembru i decembru. U skladu sa navedenim Programom, pripremljena je Informacija o implementaciji Plana djelovanja za mlade za četvrti kvartal 2022. godine, a koja predstavlja aktivnosti poduzete u protekla tri mjeseca u skladu sa Planom djelovanja za mlade Grada Sarajeva.

Zakon o mladima Federacije Bosne i Hercegovine pod pojmom mladi podrazumijeva osobe u životnoj dobi od navršenih 15 do navršenih 30 godina starosti. Važno je istaći da su mladi, iako zasebna društvena kategorija koja ima svoje potrebe i probleme, integralni dio društva i jako važna podrška razvoju svih zajednica, pa tako i grada Sarajeva.

Član 8. Zakona o mladima Federacije Bosne i Hercegovine navodi da odgovorni organi vlasti trebaju mladim osobama, putem utvrđenih mjera, dati na raspolaganje različite mogućnosti u cilju unaprijeđivanja njihovog razvoja. Pod odgovornim organima vlasti, Zakon podrazumijeva općinski, gradski i kantonalni nivo vlasti u Federaciji Bosne i Hercegovine.

Navedeni zakon obavezuje ove nivoe vlasti da odgovorno poduzimaju utvrđene mjere kako bi unaprijedili razvoj mladih ljudi. Pod utvrđenim mjerama podrazumijevaju se mjere predviđene usvojenim dokumentima, kao što su strategija prema mladima i program djelovanja za mlade koji je donijela svaka institucija zasebno na temelju strategije prema mladima.

U skladu s članom 14. Zakona o mladima Federacije Bosne i Hercegovine, općinski, gradski i kantonalni organi vlasti dužni su samostalno osigurati minimum mjera na planu rada s mladima i omladinskih aktivnosti, kao i mehanizme i kapacitete koji, između ostalog, uključuju uspostavljanje stručnog radnog tijela za izradu, ažuriranje i praćenje provedbe lokalnih i kantonalnih strategija prema mladima, a u čijem će radu učestvovati predstavnici vijeća mladih ili omladinskih udruženja.

Općinske, gradske i kantonalne vlasti zakonski su obavezne koordinisati aktivnosti u vezi s radom s mladima i omladinskim aktivnostima. Pod tom koordinacijom podrazumijeva se koordinisanje aktivnosti iz federalne, kantonalne, općinske ili gradske strategije prema mladima, odnosno programa djelovanja za mlade, te povezivanje sličnih projekata i aktivnosti, praćenje uspješnosti u provođenju i postizanju rezultata, vođenje evidencije omladinskih aktivnosti i dr.

Član 8. Zakona o mladima Federacije Bosne i Hercegovine navodi da rad s mladima nude omladinska udruženja, ostala udruženja, neformalne grupe i drugi nosioci rada s mladima iz nevladinog sektora, kao i nosioci rada s mladima iz vladinog sektora. Iz toga zaključujemo da odgovornost za rad s mladima snosi i vladin i nevladin sektor.

Kada je u pitanju nevladin sektor, pod istim podrazumijevamo omladinska i druga udruženja, neformalne grupe i druge nosioce rada s mladima, poput domaćih i stranih fizičkih i pravnih lica koja se bave pitanjima mladih ili su subjekti od značaja za promociju i zaštitu uloge i pozicije mladih, a imaju prava i obaveze u skladu s ovim zakonom.

Uzimajući u obzir gore navedeno, a u skladu sa Zakonom o mladima FBiH, Gradska služba za obrazovanje inicirala je izradu Plana djelovanja za mlade Grada Sarajeva.

Plan djelovanja za mlade Grada Sarajeva je prvi strateški dokument koji objedinjuje i razrađuje ciljeve i mjere kojima Grad Sarajevo želi odgovoriti na razne potrebe i probleme mladih i općenito poboljšati kvalitetu života mladih, te strateški podržati Gradsku upravu u radu sa mladima.

Proces izrade dokumenta koordinisala je Gradska služba za obrazovanje, sport, kulturu i mlade uz tehničku i stručnu pomoć Instituta za razvoj mladih Kult, s kojim je navedena služba saradivala i na prvom istraživanju i analizi o problemima i potrebama mladih grada Sarajeva.

Plan djelovanja za mlade Grada Sarajeva 2020.-2024. usvojen je od strane Gradskog vijeća Grada Sarajeva, na sjednici održanoj dana 04.10.2019. godine, te isti obuhvata sedam oblasti od posebnog značaja za mlade, a to su:

- obrazovanje i nauka mladih;
- rad, zapošljavanje i preduzetništvo mladih;
- socijalna briga mladih;
- zdravstvena zaštita mladih;
- kultura i sport;
- aktivizam (učesće, volontiranje i mobilnost) mladih i
- sigurnost mladih.

## IMPLEMENTACIJA PLANA DJELOVANJA ZA MLADE GRADA SARAJEVA

### OBLAST SOCIJALNE BRIGE ZA MLADE / OBLAST ZDRAVSTVENE ZAŠTITE MLADIH

#### Mjera:

- Podrška institucijama, organizacijama i programima koji na području grada Sarajeva podržavaju socijalno uključivanje mladih

Grad Sarajevo pružio je podršku aktivnostima i projektima **JU „Zavod za zbrinjavanje mentalno invalidne djece i omladine Pazarić“**, doznačavanjem sredstava u iznosu od 20.000,00 KM. Djelatnost Zavoda Pazarić je socijalno i zdravstveno zbrinjavanje, obrazovanje i osposobljavanje za život i rad prema preostalim sposobnostima i sklonostima i provođenje radne aktivnosti djece i omladine do 25. godine života sa invaliditetom – sa smetnjama u psihičkom razvoju umjerenog, težeg i teškog stepena, kao i lica sa kombinovanim smetnjama.

Do popune kapaciteta u Zavodu, može se osigurati zbrinjavanje i lica starijih od 25 godina života sa invaliditetom, sa smetnjama u psihičkom razvoju umjerenog, težeg i teškog stepena, lica sa kombinovanim smetnjama, kao i lica kod kojih je završeno liječenje u zdravstvenim ustanovama.

Gradonačelnica Benjamina Karić posjetila je navedenu ustanovu i njene štićenike te je tom prilikom potpisala ugovor o realizaciji odobrenih sredstava.

### OBLAST RADA, ZAPOSŁJAVANJA I PREDUZETNIŠTVA MLADIH

#### Cilj:

- Mladi grada Sarajeva su potaknuti koristiti programe samozapošljavanja i poduzetništva

Krajem decembra 2022. godine planirana je realizacija projekta **Munja Challenge – Winter Edition Sarajevo**, a gdje će učesće uzeti 40 mladih iz Sarajeva. Tema Challenge-a je vrlo aktualna – urbana mobilnost. Bit će to savršena prilika da se srednjoškolci iz različitih škola s područja četiri gradske općine upoznaju, saraduju i vlastita mišljenja oblikuju u konkretne ideje unaprjeđenja svoje okoline i okruženja. Za najbolji tim predviđene su prikladne nagrade. Više informacija bit će dostavljeno

Gradskom vijeću po okončanju projekta. Isti je sufinansiran od strane Federalnog ministarstva kulture i sporta.

## KONFERENCIJA „IZGRADNJA GRADOVA PRILAGOĐENIH MLADIMA U SVIJETU OD 8 MILIJARDI LJUDI“

Grad Sarajevo je, u partnerstvu sa Populacijskim fondom Ujedinjenih nacija i savezima općina i gradova u Bosni i Hercegovini, bio domaćin konferencije „Izgradnja gradova prilagođenih mladima u svijetu od 8 milijardi ljudi“.

Mnoge zemlje regije suočavaju se s brzim demografskim promjenama uslijed emigracija i niske stope fertiliteta, lokalne zajednice imaju važnu ulogu u stvaranju okruženja koje će omogućiti mladima da sa sigurnošću planiraju svoju budućnost. Stoga je izgradnja gradova prilagođenih mladima ključni element izgradnje društva koje će biti otpornije na demografske promjene.

Konferencija je okupila gradonačelnike/načelnike i predstavnike mladih iz istočne Evrope i centralne Azije. Drugi dan održavanja navedene Konferencije otkriven je mural na zgradi Osnovne škole „Vladislav Skarić“ u Sarajevu posvećen svjetskom stanovništvu koje je dostiglo brojku od 8 milijardi.

Zanimljivo je istaći da su Ujedinjene nacije 1999. godine odabrale bebu koja će predstavljati porast populacije na 6 milijardi ljudi na Zemlji, i to Visočanina Adnana Mevića, dječaka rođenog u Sarajevu. Adnana Mevića je tim povodom posjetio tadašnji generalni sekretar Ujedinjenih nacija Kofi Annan. Od tada Gradska uprava finansijski podržava Adnana, a njeni predstavnici su nekolicinu puta prisustvovali njegovom rođendanskom slavlju uz prigodan poklon i tortu. Danas je student master studija te Grad Sarajevo nastavlja izdvajati po 2.400,00 KM godišnje za njegovo školovanje.



## APLICIRANJE ZA EVROPSKI GRAD MLADIH – EUROPEAN YOUTH CAPITAL 2026

Trenutno je otvoren poziv za apliciranje za Evropski grad mladih (European Youth Capital 2026). Grad Sarajevo je podržao inicijativu Udruženja za socijalni, kulturni i kreativni razvoj „ZORA“, održani su inicijalni sastanci i pokrenute su aktivnosti za aplikaciju. Grad Sarajevo će i kroz sam aplikacijski proces dobiti na iznimnoj međunarodnoj vidljivosti, a kada bismo dobili ovu prestižnu titulu, to bi doista bio ogroman uspjeh. U proces izrade koncepta aplikacije, pored resursa Grada Sarajeva i Udruženja „ZORA“, planirano je okupiti i veliki broj drugih aktera, poput različitih nivoa vlasti, ali i svih omladinskih udruženja i organizacija koje pokazuju interes za učešće u ovom značajnom poduhvatu.

## ZAKLJUČNA RAZMATRANJA

Nakon usvajanja i stupanja na snagu izmjena i dopuna Budžeta Grada Sarajeva za 2022. godinu, planirana su izdvajanja za mlade u različitim oblastima koje tretira Plan djelovanja za mlade, a po ranije pristiglim zahtjevima različitih pravnih lica. Nadležna Služba uputila je prijedloge za pružanje podrške projektima JU Centar za kulturu i mlade Općine Centar Sarajevo, JU Srednja muzička škola,

JU Srednja mašinska tehnička škola, JU Srednja ugostiteljsko-turistička škola, JU Srednja medicinska škola – Jezero, upućen je i prijedlog za podršku nabavke sanitetskog vozila za potrebe JU Zavod za zbrinjavanje mentalno invalidne djece i omladine Pazarić i sl. Ovi projekti će biti detaljnije obrazloženi u narednoj Informaciji o implementaciji Plana djelovanja za mlade, odnosno nakon što se planirana podrška realizira. Sredstva će se doznačiti po zaključivanju pojedinačnih ugovora nakon što izmjene i dopune Budžeta Grada Sarajeva za 2022. godinu budu objavljene u Službenim novinama Kantona Sarajevo.